

## **Iemisa tiratna timbiņ rapar Outna kam**

Na Iemisna timbiņ rapara ma kam laiņ witap. Na ma tirca Raraņ Aetaniacna meikramtairmo riptinandet, te, mina tipemb kirarir laiņga raņgaina. Na ma kam roor witca tirca meikramtairmo otaca mina iroar inkar laiņ aņģica, mana kambmo matau lamņi garacna.

Na Iemisa ma gagraca aindopatna, ramootta Iesusmo ripacrenan, ma wanaiņa mba eacitndait. Wanaiņ. Ma kabena meikramtairmo tipemb kirarir laiņga monande, na anna wandacnandet, ma ritipac gargarap.

### **Totowairna moca aia witiķi gagra te, aia Raraņ Aetaniacap eteac laiņ ndeacnandet**

(1.1-18)

<sup>1</sup> Aku Iemis, na aku Raraņ Aetaniacapa, Kacoot Iesus Karaisna aiņna ramoot. Na ne Israelna parniņapa mbut mbuniņna wiwitna meikramtaira, nena ndeida ndorita pitrik waņna auņembmo tikcarica, gan tiacarpaikna kabena pitrik waņna auņembmo taņga eacrenanna, aku gan timbiņ rapara tirca neaņga makipek. Na ra laiņ ņgoin.

*Totowaiara aimo mo gagraarena*

<sup>2</sup> Aintik aukna Iesusa ripacrena laiplacar, nenmo ainta totowaiara nemo laru te, ne gaind ndamji, anna toŋtoŋna reac ningik.

<sup>3</sup> Na ne lamjirena, reac ianna nena ritipaikta totowaiara towai te, anna nenmo moca ne gagraca witikca mitkar mbuknande.

<sup>4</sup> Ainda moca memetmbaca ne witiki gagraca, ne mitkarmo mbukraŋ. Te, an tipna kirara nemo gargar ŋgoinna eacnandet. Na ne laiŋ ndeacnandet, na ne Raraŋ Aetaniacna tip kirarna reac ianna moca mba matpiitndai. Na nena tipemb kirarira wandoikca laiŋ tingik teacnandet.

*Ramootta ma iro laŋ matpi te, ma mbendei*

<sup>5</sup> Ainda moca nena rikna ramoot ianna, ma iro laŋa manmo matpi te, ma Raraŋ Aetaniacmo mbendeica mammo iro laŋ neaŋna digi te, Raraŋ Aetaniaca manmo neaŋnandet. Na Raraŋ Aetaniaca ma meikramtairmo muruŋcamiŋa reikca ndona toŋtoŋ mbuŋa neaŋrenan, na ramootta manmo digirenanna, ma mba ŋaterenanna.

<sup>6</sup> Na an ramootta ma ritipac gidikapnanna, ma Raraŋ Aetaniacmo mbendei te, ma gaimda kai ripaca gaimda kai lamji teac, “Raraŋ Aetaniaca aukmo neaŋit ki, co, wanaiŋ?” Na ramootta iro mbuniŋapnanna, ma macaitna kirar, watta macaitmo rapaca ma tamtamma rimbicca kiprena kirar.

---

**1:2** Up 5.41, na Ro 5.3-5, na Ib 10.34, na 1 Pi 1.6, na 4.13, na 4.16

**1:3** 1 Pi 1.7    **1:5** 1 GRP 3.9-12, na ML 2.3-6, na In 15.7, na 1 Io 5.14-15    **1:6** Mk 11.24, na 1 Ti 2.8

<sup>7</sup> Na ainta ramootta gainda kai lamņi teac, Raraņ Aetaniaca mamō reac ianna neaņnandet. Wanaiņ ņgoin.

<sup>8</sup> Ainta ramootta ma iro mbuniņap eacrenan, na ma kaina tīp kirara morenan, ma taup kabea mba raņgairenanna.

*Iemisa reik kocorta meikramtairapa, reik witapna meikramtairmo kam neaņrina*

<sup>9</sup> Na Iesusa ripacrena laiplacarta ianna, ma reik kocortanna, Raraņ Aetaniacna lamņiac ņgoutta, ma i aniacap, na ma toņtoņap eacnandet.

<sup>10</sup> Na ramootta reik witapnanna, Raraņ Aetaniaca mana imo aņģi irik te, ma toņtoņap eac. Na ramootta kitukndukmo toņgoca aņģica tumbunna tikrenanna, ma katgarta kokocar menacrena kirar toca menacnandet.

<sup>11</sup> Ainda moca aia lamņirena, ra gacreke, mana owowaia, ma katgarmo moa menacrena. Ainda moca katgarta kokocara guruca irikrenan, aintik mina lamboir laiņga kocnaia mainandet. Ainda moca ramootta reik witapnanna, ma eacrenan mbuņa, ma ainta aiņirmo ainda moi taņ taņi, ma menacnandet.

*Raraņ Aetaniac ma aimo laņa morenan, na ma aimo mba wiņga tīp kirar ņgoreaca mba morena*

<sup>12</sup> Na ramootta witikca gagrarenan, na memetmbaca ma mitkar mbukrenan, ma toņtoņ ņdeacnandet. Na ma totowairmo

---

**1:8** Ie 4.8    **1:9** Ie 2.5    **1:10** Ņap 37.2, na 90.5-6, na 1 Ko 7.31, na 1 Pi 1.24, na 1 Io 2.17    **1:10** Ais 40.6-7    **1:12** ML 3.11-12, na 2 Ti 4.8, na Ib 12.5, na Ie 2.5, na 1 Pi 5.4, na KIEK 2.10

kocnai mo irik te, Raraŋ Aetaniaca manmo iarwarna eteacna wat neaŋca ma memetmbaca laŋ ndeacraŋnandet, na anna mana gagam. Na Raraŋ Aetaniaca ma mboprina, ramootta manmo matjirenanna, ma minmo an gagamma neaŋnandet.

<sup>13</sup> Na reac ianna meac, co, ramoot ianna nikinik iroa moca manmo wiŋga ma tip ŋgoreacna makukca mo te, ma gainda kai mbop teac, “Raraŋ Aetaniaca ma ndo aukmo moca aku an reac morina.” Wanaiŋ ŋgoin, Raraŋ Aetaniacmo tip ŋgoreacna makukca manmo mba wiŋrenan, na ma meacramootmo mba wiŋga tip ŋgoreacna makukca morenan.

<sup>14</sup> Na aina muruŋna kabe kabena, iroar inkara ndori ŋgepca, aimo wiŋrenan. Na an tonŋton ŋgoreac ainan, ma ndo aimo wai aoca aimo parurenan, aintik aia tip ŋgoreacna makukca mona iroap.

<sup>15</sup> Ainda moca an iroar inkara moi ŋgepna tip kirara, ma meaca nik tikca eacrena kirar toc, na iŋmbaia ma tip ŋgoreacna makukca moa larurenan, an tipna kirara meaca moonnuoca mirrena kirar toc. Ainda moca tip ŋgoreacna makukca acnai te, ma memenaca moa larurena.\*

<sup>16</sup> Aintik aukna matjirena Iesusa ripacrena laiplacar koind, moca ne an tip kirarmo watcarica ma nenmo paru nari.

---

**1:14** Ro 7.7-10    **1:15** Nŋap 7.14, na Ro 5.19-21    \* **1:15** Ma meaca nik tikca eacrena kirar toc, na iŋmbaia moonnuoc acnaica te, ma mirnande. An tip kirar kabe toco, tip ŋgoreacna makukca ainda morena, na ma memenaca moa larurena.

17 Na reik lainapa, reikca aia wanain naangirenanna, mina lain, na mina muruņa tamuņa auņ ndiņa kiprenan. Na Aetta riac tamuņa memetacara muruņa morinan, na ma ndo an reikmo aimo mandaca irikrena. Na an Aetta ma ndona tipemb kirarira mba ņgetrikirenan ņgoin. Na ma rana papaca reac ianna angica, ma taņi rocot, co, matipna kirara wanain.

18 Na mana tonņtonj mbuņa ma aina Aet ndarurina. Na mana kam gidik mbuņa ma aimo moa larurina. Na ma morina meikramtairapa, kabena reikmo aia mana outmbaina wiwitna kirar ndeacnande.

## **Na aia Raraņ Aetaniacmo gidikca ripac te, aia tipemb kirarir lain motocmo monandet** *(1.19—5.6)*

*Aia kammo waraca man motoco rangai*

19 Aintik aukna matņirena Iesusa ripacrena laiplacar koind, ne an reikmo matau ņgoinna lamņiraņ. Ne muruņcamiņa tawi ņgoinna ndorita kourmo ikca kam mbarac, na ne kammo kai tawi nda ruti mbop teac, na ne nikkakatapa kaekga kai tawi mo teac.

20 Na anna gaind, meacramootna nikkakatta Raraņ Aetaniacna tip kirar wandoņa mba moa larurenanna.

---

**1:17** Mal 3.6, na Mt 7.11, na In 3.27, na Ro 11.29, na 1 Ko 4.7

**1:18** In 1.13, na Epe 1.12, na Ie 2.3, na 1 Pi 1.23, na KIEK 14.4

**1:20** ML 10.19, na 17.27, na LR 5.1-2, na 7.9

<sup>21</sup> Ainda moca tipemb ngadudukarapa tipemb ngoricka muruŋcamiŋa acnairenan, na anna ne mo kecar. Na Raraŋ Aetaniaca nena iroar inkara tikca mutocrina, kammo aŋgica ne ndorimo tamuŋa kai tik teac. Na an kamma nena nerngaourmo mac nda aŋgina min.

<sup>22</sup> Na an kamma ne aŋgirinanna, ne anna ranŋairan. Na ne manmo kai warac ningikca, kai warac teac, wanaiŋ. Na ne wanaiŋa warac te, ne ndorimo maparuek.

<sup>23</sup> Ainda moca ramoot ianna Raraŋ Aetaniacna kammo wanaiŋa waracrenan, na ma mba ranŋairenan, anna ramootta ndona inpaŋanmo ninikna inikca tikca watrena kirar toc.

<sup>24</sup> Ma ndona inpaŋanna watca, na ma taŋ mandaca, ma tawi ngoinna iro ndarekrekeca ma ndona inpaŋanmo mba lamŋitndai.

<sup>25</sup> Na an tip wandikca ma tip ngoreacna makukna gargarmo, mo iriknandet, na aia tip ngoreacna makukna tuomna aiŋ kamainda momoa mba mac moitndai. Na an tip wandikca ma wandoŋ ngoin. Na ramootta an tip wandikmo matau wat te, na mana kammo ranŋai te, Raraŋ Aetaniaca an ramootna aiŋirmo matau ngoinna moca larunandet. Na an kammo, kai warac ningikca kai warac teac, na kai tawi ndarekrekke teac.

<sup>26</sup> Na ramoot ianna gaimd ndamŋi te, “Aku Iesusa ripacrena laiplacarta laŋ ian,

---

**1:21** 1 Ko 15.2, na Kol 3.8, na Ib 2.3, na 1 Pi 1.9, na 2.1 **1:22** Mt 7.21, na 7.26, na Lk 6.46, na Ro 2.13, na 1 Io 3.7 **1:23** Lk 6.47, na Ie 2.14 **1:25** In 13.17, na Ro 8.2, na 2 Ko 3.18, na Ie 2.12 **1:26** Nŋap 34.13, na 39.1, na 141.3, na 1 Pi 3.10

na aku Raraŋ Aetaniacmo matau ŋgoinna mbendeirena.” Na ma ndona upmo mba mataua bubuocrenanna, anna ma ndo mbuŋa parurenan. Ainda moca mana ritipaikapa, mana mbembendeia, anna reac wanaiŋ niŋgik.

<sup>27</sup> Na Iesusa ripacrena laiplacarta tip kirara ma wandonŋ ŋgoin, na aina Aet, Raraŋ Aetaniacna lamniaca ma makukar kocor. Na anna gaind, aia meik koinmbarapa, mombonikca mina aemaeta menacrinanmo, lamŋica mina makukarta moca minmo otac. Na kabena reac ian toco, aia ndorita tatanŋ, kikipna ŋginaŋmo matau wat, te, gan tiacarpaikna tipemb kirarira aimo Raraŋ Aetaniacna lamniacmo, mba moca ŋgaduduki watitndai.

## 2

### *Meikramtair muruŋcamiŋmo aia tip kirar kabea moranŋ*

<sup>1</sup> Na aukna Iesusa ripacrena laiplacar, ne aina Kacoot Iesus Karaismo ripacrinan, na ma tamuŋna auŋna reik laiŋ, laiŋ koindta Kacoot. Ainda moca ne irembapna meikramtairmo tipemb kirarir laiŋga moranŋ te, na iremb kocor-tanmo iŋ neaŋraŋ nari.

<sup>2</sup> Na ramoot ianna nena mimitpac aŋgirena kaca matau ŋgoinna lamboi laiŋ aoca, na mana patŋitta ma patŋit ŋgapaocna raica mina gol mbuŋa morinan aoca ma kipca mbuk te. Na an kidrik toco, ramoot ianna aocna reik laiŋ

---

**1:27** Ais 1.16-17, na 58.6-7, na Mt 25.36, na Ro 12.2, na 1 Io 5.18  
**2:1** TW 1.17, na ML 24.23, na Mt 22.16, na Up 10.34, na Ie 2.9

kocora, na ma reac bagar tititac ngoreac aoca kipca anna mbuk te.

<sup>3</sup> Na an lamboi laŋ aoca kiprina ramootmo, ne manmo matau monandet, na ne manmo gain-dopnandet, “Laŋ ngoin, u kipca gan mbibiracna taup laŋa mbirac.” Na ne an reik kocorta ramootmo, ne aindopit ki, “U mona witik, co, u aukna or kitimmo pitrik pikinna mbirac.”

<sup>4</sup> Na ne ainta tip kirara mo te, anna ne kabena meacramootna tip kirarmo, ne ndorita iroar puŋga ritrirenan. Na ne mba mataua lamŋica meikramtairmo muruŋcaminŋmo, tip kirar kabe mbuŋa mba ritrirenanna, wanaiŋ. Na ne an ritri waparacna ramootta ma meikramtairmo iro ngoreac mbuŋa ritri waparaca morina kirar.

<sup>5</sup> Ainda moca aukna matŋirena Iesusa ripacrena laiplacar koind, ne warac, reik kocorta meikramtair ndaekpembca, gan tiacarpaikna meikramtairta lamnikca mina reik kocor teacrenan, an meikramtair tingikca Raraŋ Aetaniaca minmo larapacrina, na ritipacna tip kirarmo mina laŋ ngoin ndeacnandet. Na ngaua ma gaimda babuatna, meikramtaira manmo matŋirenan ngoinna, ma minmo ndona bubuocna inikca tiknandet. Ainda moca ma an reik kocorta meikramtair ndaekpembmo larapacatna, te, mina an bubuocna inikca eacnandet.

<sup>6</sup> Na ne an iremb kocorta meikramtair ndaekpembmo numbira neaŋrenan. Na ne gaind ndamŋi, mandaia ndo nenmo makukara

---

**2:5** Mt 5.3, na In 7.48, na 1 Ko 1.26-28, na 1 Ti 6.18, na 2 Ti 4.8

**2:6** Up 13.50, na 18.12, na 1 Ko 11.22, na Ie 5.6



neanrenan, na nenmo mo irikrenan, na ritri waparacna taup naanġia tanrenan? Na anna an meikramtaira kitukndukapa, reik witapnanna, mina ndori ainda morenan.

<sup>7</sup> Na Raraġ Aetaniaca nenmo Karaisna i lanġmo, nenmo tikrenan, na mandaia ndo an imo peperena kam ngoreac ndopit? An meikramtaira kitukndukapa, reik witapnanna, ndori anna morenan.

<sup>8</sup> Na aina gagrirta ramoot paġan Raraġ Aetaniac, mana Timbigta Kapna inikca ma aimo Tip Wandik ianna neanġa gaindopatna, “U ndo ngoinna matjirenanna, an tipna kirara u kabena meikramtairmo, ainda matjiraġ.” Na ne Raraġ Aetaniacna an tip wandikmo matau ngoinna ranġairaġ te, ne tip kirar laġa morena.

<sup>9</sup> Na ne ramoot ianmo tip kirar laġa mo te, na ne kabena ramoot ianmo inġ neanġ te, anna ne tip ngoreacna makukca moapekna. Ainda moca an Tip Wandikca nenmo wandacri, ne Tip Wandikmo mba waraca ranġairena meikramtair.

<sup>10</sup> Na ramoot ianna Tipemb Wandikmo muruġcamiġa ranġairenan, na ma kabe ianmo ranġai ngocor te, anna ma makukap, na an tipna kirara ramootta Tipemb Wandikmo muruġcamiġa mba ranġairenanna kirar toc.

<sup>11</sup> Na aia lamjirina, Raraġ Aetaniaca ma aindopatna, “Ne meikramtairta tipemb ngadudukarta tipemb kirarira kai mo teac.”

---

**2:8** TN 19.18, na Mt 19.19, na 22.39, na Ro 13.8-9, na Gal 5.14

**2:9** TW 1.17    **2:10** TW 27.26, na Mt 5.19, na Gal 3.10    **2:11**

NA 20.13-14, na TW 5.17-18, na Ro 13.9

Na ma gaind motocmo, mbopatna, “Ne kabena meikramtairmo kai mo menac teac.” Na u meikramtairta tipemb ngadudukara mo ngocor, na u meac, co, ramoot ianna mo menac te, anna u Tip Wandikca rangai ngocorta ramoot ian ndarurina.

<sup>12</sup> Ainda moca ne gaind koinda matau lamji. Raraŋ Aetaniac ma lamjinande, gan tip ngoreacna makukna gargar mo irikna tip wandikap, na an tip wandikca ma aimo tip ngoreacna makukna tuomna aiŋ kamaind mac mona toawanaiŋ. Na Raraŋ Aetaniaca ma an tip wandikmo ma lamjinandet, te, ma nena tipemb kirarirmo ritri waparaca monandet. Aintik ne muruŋcamiŋa memetmbaca ainta kambapa tipemb kirarirmo, an ramootta gan tip wandikna kaŋgaukca eacrena tip kirara moraiŋ.

<sup>13</sup> Na ramoot ianna kabena ramoot ianmo kadmaia mo ngocor te, Raraŋ Aetaniaca manmo ritri waparacna ra, manmo ritri waparaca mo te, Raraŋ Aetaniaca manmo mba kadmaica otacitndai. Na ramootta kabena ramootmo kadmaire-nanna, Raraŋ Aetaniaca manmo kakadmaica ritri waparacna ramo, manmo kadmainande.

*Ritipacna tip kirara tip kirar laiŋmo mo laru ngocor te, anna reac wanaiŋ*

<sup>14</sup> Na aukna Iesusa ripacrena laiplacar, meacramoot ianna aindop te, “Ma Karaismo ripacrenan.” Na ma tip kirar laiŋa mba morenan. Te, mana ritipaca anna reac wanaiŋ. Na

---

**2:12** Gal 6.2, na Ie 1.25-26, na 1 Pi 2.16      **2:13** ML 21.13, na Mt 5.7, na 18.32-35, na 25.41-42, na 1 Io 4.17-19      **2:14** Mt 7.21, na 7.26, na Ie 1.23

ainta ritipaca manmo mac nda anjina min ki? Toawanaij.

<sup>15</sup> Na Iesusa ripacrena laiplacarta lap, co, mbi ianna ma tik ngapaocna raranjit ngoreacap, na ma amta reik kocor te,

<sup>16</sup> na nena ianna manmo aindop te, “U nikinik iro wetwet ndeac. Na u tanca tik ngapaoc tikca una tikmo anji kitac, na u tanca amna reac anjica am.” Te, an kamma manmo titoc ngotacit? Ne ndori, manmo tik ngapaocapa, amna reac manmo neaj te, anna ndo mana tikmo otacnandet.

<sup>17</sup> Na ritipacna tipna kirar toco gaind, ma wanaij ndeac te, na ma tip kirar lajmo mo ngocor te, an ritipaca ma reac wanaij.

<sup>18</sup> Na meacramoot ianna aindop te, “Ramtair ndeida mina ripacrenan, na ramtair ndeida mina tipemb kirarir lainga morenan.” Ainda moca aku an kamma ainda rutina mamoeek, “Na u toco ripacrenan, na u tip kirar laja mba morenanna, ainda mo te, aku una ritipaca titoc ndamjit? Na aku ndo aku tip kirar laja monandet, na anna ndo aukna ritipaca unmo wandacnandet.”

<sup>19</sup> Na u ainda ripacrena, “Raranj Aetaniaca ma kabe ninjik ndeacrena.” Na anna laj. Na nerngaur ngorik toco ainda ripacrenan, na mina nanambirena.

<sup>20</sup> Aintik u nanaorena ramoot. U ripac te, na u tip kirar laj toco mo ngocor te, una ritipaca

---

**2:15** Iop 31.19-20, na Lk 3.11, na 1 Io 3.17      **2:17** Ie 2.20, na 2.26

**2:18** Gal 5.6, na Ie 3.13      **2:19** Mt 8.29, na Lk 4.34, na Up 16.17

anna reac wanaiŋ. Na u an kamna miniŋa waracna morena ki? Aintik u warac.

<sup>21</sup> Atua aina nicau Abraamma, ma ndona nuoc Aisakmo aŋgica, gimbamba morena taupca tikca manmo Raraŋ Aetaniacmo, gimbamba mona morinan. Aintik an minna Raraŋ Aetaniaca mana tip kirara watca, mammo ramoot wandonŋ maacat.

<sup>22</sup> Na ne matau lamŋi. Abraamma mana ritipaikapa, mana tip kirar laŋa ndoniŋa tikca, an tip kirar laŋa, anna ndo mana ritipaca moa minna tikrina.

<sup>23</sup> Na Raraŋ Aetaniacna timbigta kapca aindoprinan, “Abraamma ma Raraŋ Aetaniacmo ripacat tik, ma manmo ramoot wandonŋ maacat.” Na ma Abraammo gaind ŋgacatna, “Aukna aikndamoot.” Na an kamna miniŋa Raraŋ Aetaniaca morinanna, mina ande mana timbigta kapca tikrinan. Na an tip kirara Abraamma Aisakmo, morinanna ma raek ndarurina.

<sup>24</sup> Aintik mandeaca ne malamŋica, ritipac niŋgik mbuŋa Raraŋ Aetaniaca ramootmo wandonŋa mba acrenanna. Wanaiŋ. Ramootta tip kirar laŋa morenan, Raraŋ Aetaniaca ma anna lamŋirena, na anna miniŋna moca ma manmo ramoot wandonŋ ŋgacrena.

<sup>25</sup> Ainda moca an kirar mbuŋa kabena meacramootap kaŋtertaapna tipca morena meac Reap, ma Iosuana mandaca kiprina ramtairmo bubuocrina, na ma minmo kabena

---

**2:21** RL 22.1-14    **2:22** Ib 11.17-18    **2:23** RL 15.6, na 2 Nin 20.7, na Ais 41.8, na Ro 4.3, na 4.9, na 4.22, na Gal 3.6    **2:25** Ios 2.1-21, na Ib 11.31

taup ndiᅇa mandaca mina nda matangat. Aintik Raraᅇ Aetaniaca mamō meac wandōᅇ ᅇgacatna.

<sup>26</sup> Aında moca aia lamᅇirena, tikca ma ᅇeron kocortan, anna ma menacrinan. Na an tipna kirar mbuᅇa meac, co, ramootta aindop te, ma ritipacap, na ma ritipacna tip kirar laᅇa mo laru ᅇgocor te, an meac, co, ramootna ritipaca ma memenacna kirar toc.

### 3

*Aia ndorita mboprena kambta moca matau wat*

<sup>1</sup> Aukna Iesusa ripacrena laiplacar, moca nena rikna ramtair witta an ririptina aiᅇa Raraᅇ Aetaniaca tongorena tipna kirar angica, an mbuᅇa meikramtairmo ripti nari. Na anna gaind, an minna Raraᅇ Aetaniaca meikramtairta tipemb kirarirta ritri waparac mo te, aia ririptina aiᅇa morena ramtaira, ma aina aiᅇirmo mataui ritri waparaca monandet.

<sup>2</sup> Na kidrik witca aia reac ianna mona iroar landamᅇiarap, na aia katta morenan. Na an tipna kirara aimo muruᅇcamᅇᅇ ndarurenan. Na ainta ramoot ianna eac te, na ma kammo wandōᅇ niᅇgikca mbopca mitkar kocor, ma ramoot laᅇ ᅇgoin, na ma ndona tikmo muruᅇa matau ᅇgoinna bubuocna min.

<sup>3</sup> Na osna upmo, aia aen tip teker ian tikca mamō moca, aia taᅇrena taupca ranᅇaica taᅇrena. Na an tipna kirara aia mina upna tiᅇara morena, na mina tikca anna ranᅇairenan.

<sup>4</sup> Na langumna tip kirar tocmo ne lamñi, ma reac aniác, na wat aniaca manmo rapaca ma macaitta tañrenan. Na mana tiñara morena reaca tekernoc ñgoin. Ainda moca mana tiñara morena ramootta, ma tenna tañna mo te, ma an tiñar ñgutija tiñara mo te, langumma mana tañna tongorena taupca tañnandet.

<sup>5</sup> An kirar kabea mimma ma aina tikna umbum tekernoc, na ma ndo weraireke, ma ndona imo tamuña tikrena.

Na aia lamñirena, tac tekernoca ma ñgepi acnai te, ma rañmo muruña wirnandet.

<sup>6</sup> Ainda moca mim toco ma tacna kirar. Na ma aina tikna umbum motem, na ma aimo ainta tipemb ñgorikca moa larurena. Na ma aina tikmo moa ñgocairena, na aina tikmo ainta tipemb ñgorikca moca tacna owaina kirar. Na an taca ma menac ñgocorta iarwara wirrena tac.

<sup>7</sup> Na meikramtaira rañna amta ñgoaebapa, ñgorikcapa, nduipapa macait inikna reikmo añañica ndorita bubuocna kañgaukca tikrena.

<sup>8</sup> Na ramoot ianna ma ndona mimmo bubuocna toawanaiñ. Na memetmbaca aina mimma ñgepca kamb ñgorik toprena, na ma aimo, mo menacna kocna kirar toc. Ainda moca ma aina mimmo minna tikca eacrena.

<sup>9</sup> Na mim mbuña aia aina Kacootna i añaña ñgeprenan, na ma aina Aet. Na Rarañ Aetaniaca ma meikramtairmo moca mina man toc ndarurena, na mim mbuña aia kabena

---

**3:5** Ñap 12.3, na 73.8-9, na ML 12.18, na 15.2      **3:6** ML 16.27, na Mt 12.36-37, na 15.11, na 15.18-19, na Mk 7.15, na 7.20, na 7.23

**3:8** Ñap 140.3, na Ro 3.13      **3:9** RL 1.26, na 5.1, na 9.6, na 1 Ko 11.7

meikramtairmo kam ŋgorik topca minmo moa ŋgocrairena.

<sup>10</sup> Na an up kabe mbuŋa aia Raraŋ Aetaniacna i aŋgia ŋgeprena, na kamb ŋgorik toprena. Aintik aukna Iesusa ripacrena laiplacar, ainta tipemb kirarira lainga wanaiŋ.

<sup>11</sup> Na au puk ianna ma mba puk rat laŋapa, teramna pukapmo kapca mba mo larurenanna, wanaiŋ.

<sup>12</sup> Na aukna Iesusa ripacrena laiplacar, ne tit ndamŋirena, ŋgaŋin ikca ma olip loora erna min ki? Wanaiŋ. Na wain ŋgatiŋka ma ŋgaŋinna loora erna min ki? Aintik an kirar kabea teramna pukca ma puk rat laŋa mba mo laruitndai.

*Ramootta iro laŋapnanna ma tip kirar laŋa monandet*

<sup>13</sup> Na nena rikna meac, co, ramoot ianna ma iro laŋapa landamŋiap eacrena ki? Na ainta ramootta eac te, mana tataŋapa eteaca laŋ ndeacraŋmandet. Na ma kai garuru teac, ma laŋan wetwet ndeac, na ma ndona imo kai aŋgi ŋgep teac. Na ma iro laŋapa landamŋi laŋna tip kirarmo matau raŋgairan te, meikramtaira mana morena tipemb kirarir lainmo wat rapacmandet.

<sup>14</sup> Na ne kabena meikramtairmo nikinik iroar ŋgorikap, na ne memetmbaca ndorita irembmo aŋgi ŋgepna taupembta moca orerenan, na ne ndorita iroar lainpapa landamŋi lainŋta moca kai tongoran teac. Moca ne paruca nena tipemb kirarira kam gidikmo mo irikmandet.

15 Na ainta iro laɲapa landamɲi laɲa ma tamuɲna auɲ ndiɲa mba kɪprinan, wanaiɲ. Ma gan tiacarpaikna reac niɲgik. Na ma nikinik iro bagar ndiɲ ndarurenan, na ma Paparuna Ramoot, ma mana aet.

16 Na ne warac, meikramtaira kabena meikramtairmo iroar ɲgorikcapnan, na memetmbaca mina ndorita irembmo aɲgi ɲgepna taupembta moca orerenan, mina laɲa mba mbiraca eacrenanna. Na mina kaina tipemb ɲgorikca mina morena.

17 Na meikramtaira ainta iroar lainɲapa landamɲiara Raraɲ Aetaniac ndambuɲnan aɲgirenana, mina ainta tipemb kirarira morena. Out ɲgoinna mina iroar landamɲiar ratara ranɲairena. Na an ndambuɲnanna, mina kabena meikramtairap nikinik iroar wewetarap eacrenan, na minmo tipemb kirarir wewetara moranɲ, na mina, mina kambmo waracrena. Na mina kabena meikramtairmo kakadmajna opotaca morenan, na mina minmo tipemb kirarir lainɲa morenan. Na an tipembta iro kabea mina meikramtairmo muruɲcamajna morena. Na mina tipemb kirarir lainɲa ranɲairenan, na mina mba parurenanna, wanaiɲ. Mina tipemb kirarir lainɲ gidkara ranɲairena.

18 Na aia an nikinik iro wetwet kabeap eac te, anna aia amta reikca mutocrena kirar. Na an nikinik iro wetwet kabe mbuɲa, aina eteacna

---

**3:15** Pil 3.19, na Ie 1.5, na 1.17      **3:16** 1 Ko 3.3, na Gal 5.20

**3:17** Ro 12.9, na 1 Ko 2.6-7, na 1 Pi 1.22, na 1 Io 3.18      **3:18** ML 11.18, na Ais 32.17, na Mt 5.9, na Pil 1.11, na Ib 12.11



watna tipemb kirarir wandoik lainga larurenan, anna amta reik lainga warin nangacrena kirar toc.

## 4

*Ramootta gan tiacarpaikna tipemb kirarira tongorenanna, ma Raraŋ Aetaniacna puŋdamoot*

<sup>1</sup> Na ne tit ndamŋirena, kaina reacna mininŋa ndo moca nemo kaegapa, runduŋa nena rikca moa larurenan? Anna nikinik iroar mo ŋgeprena tipemb kirarira nenap eacrenan, mina ndorimo nena tikna umbumap ruŋrenan, na an tipemb kirarira ndo, runduŋapa kaega mo ŋgeprenan. Na anna gidik ki?

<sup>2</sup> Na titocna reikca ne anŋina toŋtoŋgarapnan, ne mba anŋiitndai. Ainda moca ne meikramtairmo pia menacrenan. Na ne reikmo lamnik puŋga watca tongorenan, na ne anŋina minna wanaiŋ. Aintik ne nikembkatca kaega moa ŋgeprenan. Na ne Raraŋ Aetaniacmo mba mbendeirenanna, ma ndo nenmo reik neaŋrenan, na anna mininŋa moca ne reikca mba anŋirenanna.

<sup>3</sup> Na ne Raraŋ Aetaniacmo reik anŋina mben-deireke, ne mba anŋirenanna, an kidrikca nena iroara lainga eac ŋgocor, aintik ne mbende-ica digirenan. Na nena nikinik iroar landamŋiara, ne ndorita tikemb ŋgotacna reik anŋina toŋtoŋgarap.

---

**4:1** Ro 7.23, na Gal 5.17, na 1 Pi 2.11      **4:3** Ŋap 66.18, na Ais 1.15, na Mai 3.4, na Sek 7.13, na 1 Io 3.22

<sup>4</sup> Aintik ne Raraŋ Aetaniacmo tikcamacariri, an kirara meaca ndona kaŋgaitta tikcarica ma taŋga tipemb ŋgadudukarta tip kirara morenan. Aında moca ne warac. Ramootta gan tiacarpaikna tip kirarna iro landamŋiap eac te, ma Raraŋ Aetaniacmo puŋdamootna tip kirara morena. Anna moca ne mba lamŋirenan ki? Aintik ramootta gan tiacarpaikna tip kirarap aikndamootta mo te, ma Raraŋ Aetaniacna puŋdamoot ndarunandet.

<sup>5</sup> Aında moca Raraŋ Aetaniacna timbigta kapca gainoprina, “An ŋeroŋa ma aina inicka tikca eacrenanna, Raraŋ Aetaniaca tongorenanna, ma mana kaŋgauk niŋgik ndeacraŋ.” Na ne tit ndamŋirena, an kamma ma reac wanaiŋ, ki?

<sup>6</sup> Na Raraŋ Aetaniaca ma aimo kakadmai bagarianiac ŋgoinna morenan. Aintik Raraŋ Aetaniacna timbigta kapca gainoprena, “Meikramtaira ndorita irembmo aŋgia ŋgeprenan, ma mina irembmo aŋgia iricka pikinna tikrena. Na meikramtaira ndorita irembmo pikinna tikrenanna, ma mina moca kadmairenan, na ma minmo laŋa morena.”

<sup>7</sup> Aında moca ne ndorimo aŋgi pikinna tikca Raraŋ Aetaniacna kaŋgauk ndeacraŋ. Na ne Paparuna Ramoot narica iukaica manmo kai raŋgai teac, ma nenmo tikcarica ma kipcarinandet.

---

**4:4** In 15.19, na 17.14, na Ro 8.7, na Gal 1.10, na 1 Io 2.15    **4:5** RL 6.5, na NA 20.3-5, na Ndu 11.29, na ML 21.10    **4:6** Ŋap 138.6, na ML 3.34, na Lk 14.11, na 1 Pi 5.5    **4:7** Epe 4.27, na 6.11-12, na 1 Pi 5.7

<sup>8</sup> Na ne Raraŋ Aetaniacmo rambuŋ ŋgoinna taŋ te, ma nenmo kipi rambuŋainandet. Na ne tipemb ŋgorikta makukara morena meikramtair, nena nikinikna iroara moi mina rat ndarunandet. An kirara ramootta ma ndona parniŋmo tukica ma rat ndarurena kirar. Na ne meac, co, ramootta iro mbuniŋapnanna, ne an iroar inkar ŋgorikmo ne mo kecar.

<sup>9</sup> Na ne kakadmaina tip kirara moca, ne kadmaica aeraŋ. Na ne mandeaca laroŋrenan, ne an tip kirara ŋgetrikica ne aeraŋ. Na ne mandeaca tongoca eacrenanna, ne an tongorena tip kirarmo ne ŋgetrikica ne kakadmaina inpaŋanna tip kirar aŋgi.

<sup>10</sup> Ainda moca Kacootna lamniac ŋgoutmo ne ndorita irembmo aŋgi irikraŋ. Te, ma nena irembmo aŋgi ŋgepraŋnandet.

*Aia kabena meikramtairmo iŋa kai mbopraŋ teac*

<sup>11</sup> Na ne Iesusa ripacrena laiplacar, ne Raraŋ Aetaniacna kabena meacramootmo kam ŋgoreaca kai mbop teac. Na ramootta kabena meacramootmo kam ŋgoreac, co, manmo ritri waparaca moraŋ te, ma Tip Wandikmo kam ŋgoreac mambopreke, na ma Tip Wandikmo ritri waparac mamoreke. Na u Tip Wandikmo ritri waparaca mo ndop te, u Tip Wandikna kaŋgauk ndeacrena ramootta wanaiŋ, u manmo ritri waparacna ramoot malaruri.

---

**4:8** 2 Nin 15.2, na Ais 1.16, na Sek 1.3, na Mal 3.7, na Ie 1.8, na 1 Io 3.3    **4:10** Iop 5.11, na 22.29, na Mt 23.12, na 1 Pi 5.6    **4:11** Lk 6.37, na Ro 2.1, na Epe 4.31, na 1 Pi 2.1

<sup>12</sup> Na Raraŋ Aetaniac, ma ndo kabe niŋgikca Tip Wandikca moa larurinan, na ma ndo kabea ritri waparacna ramoot. Na ma ndo niŋgikca meikramtairmo mac nda aŋgina min, na minmo mo ŋgocraina min. Aintik u mandai, na u kabena meikramtairmo ritri waparaca morenan?

*Aia kai garuru teac*

<sup>13</sup> Na ne aukmo warac, aku nenmo kammap, ne meikramtaira gaindoprenan, “Mandeac, co, ŋorap aia auŋ aniac ianna taŋca iar ianna an ndeaca kitukndukna aiŋa moca, kituknduk aniac aŋgiraŋnandet.”

<sup>14</sup> Na ne an kam kirarmo ne mboprenan, na ŋorapa ndataruna reaca ne mba lamŋireke. Na nena eteacna watta, ma wauna kirar, ma laruca teker emtem ndeaca, ma mainandet.

<sup>15</sup> Aintik ne aindop, “Anna laŋ, Kacootta toŋgo te, aku eteacna watap eaca an reikca aku lamŋirenanmo aku monandet.”

<sup>16</sup> Na ne ndorita irembmo aŋgia ŋgepca, ndori mona aiŋir anikta reikta kamb toprena. Ainta tip kirara anna u ndona paŋan garurna i aŋgia ŋgeprena tipna kirar, na anna tip kirar ŋgoreac ŋgoi.

<sup>17</sup> Aintik ne matau lamŋi. Na u tip kirar laŋ ianna u monanna lamŋi te, na u mba mori, anna u tip ŋgoreacna makukca morina.

---

**4:12** Mt 10.28, na Ro 2.1, na 14.4, na 14.13      **4:13** Lk 12.18-20

**4:13** ML 27.1      **4:14** Ŋap 39.5, na 39.11, na 102.3, na Ie 1.10, na 1 Pi 1.24      **4:15** Up 18.21, na 1 Ko 4.19, na Ib 6.3      **4:17** Lk 12.47, na In 9.41, na 15.22, na Ro 1.20-21, na 2.17-18, na 2.23

## 5

*Meikramtaira reik witapnanna, mina opoik ngoreac anginandet*

<sup>1</sup> Ainda moca mandeaca ne reik witapna meikramtaira, aku nenmo kammapp. Na nenmo laruna mitkar bagraranikta moca ne lamņiraņ, na ne aeraņ, na ne larikraņ.

<sup>2</sup> Na nena reik wit lainapa, lamboira mina ngocrairina. Na nena tik ngapoikca bobodira amba otererinan.

<sup>3</sup> Na nena kituknduk aniacna wautniņa go-lapa silwa maniņa kawirira moa ngocrairina. Na an ngogocraica ma nena tipemb ngorikta makukarmo moi raekca tiknandet. Na ma nena tikmo tac toca wirnandet. Na gan tiacarpaikna mamamaina ra, kipca rambuņairinan, na ne an reik witapa kitukndukmo wanaiņa punirena.

<sup>4</sup> Na ne matau warac, ramtaira nena wariņa aiņa morinanna, ne minmo paruca kituknduk tipca mba neaņri, na an kituknduk tipca ne utiņrenanna, ma Raraņ Aetaniacna ngacrenan, te, ma nena tipemb ngorikmo rutinande. Na an aiņa morina ramtairta ataca ma Kacoot Gargar Aniacapna koara malarurina.

<sup>5</sup> Na memetmbaca ne gan tiacarpaik ndeacrinanna, ne reik laiņ, laiņ anģica toņtoņgarap eacrina. Na ne amba, amba tikembca aocarica, na nenmo mo menacna ra ma kipca larurina.

---

**5:1** ML 11.28, na Lk 6.24, na 1 Ti 6.9    **5:2** Iop 13.28, na Ie 2.2

**5:2** Mt 6.19    **5:4** TW 24.14-15, na Ier 22.13, na Mal 3.5    **5:5**  
Ier 12.3, na 25.34, na Emo 6.1, na 6.4, na Lk 16.19, na 16.25, na 1 Ti 5.6

<sup>6</sup> Na ramtair wandoikmo ne angica minmo ritri waparaca mona tikrinan, na minmo moa menacrinan. Na mina nena gagarca mba ndari, na mina nenapmo mba nda ruŋri.

## **Aia gagraca eaca Raraŋ Aetaniacmo mbendeia Kacootna kikipna lambina**

(5.7-20)

*Aia ndorita iroar inkara moi gagraca mitkara  
mbukca Kacootna lambina*

<sup>7</sup> Aintik ne Iesusa ripacrena laiplacar, ne ndorita nikinik iroarmo moi gagraca, na ne mitkarmo mbukraŋ, na Kacootna kikipna lambiraŋ. Na ne lamŋirenanna, wariŋapna ramootta ma ndona wariŋna amta reikmo laiŋ taruna moca, ma lambica pukap ra ndoniŋna aiŋa mo mai te, iŋmbaia ma ndona wariŋna amta reikmo angica amnande.

<sup>8</sup> Aintik ne toco, ne iroar inkara moi gagraca laŋan ndeac, na mitkar nenmo larurenanmo, ne mbuk. Na Kacootna nda kikipna ra, kipca marambuŋairi. Aintik nena iroar inkara gagraca eacraŋ.

<sup>9</sup> Aina moca aukna Iesusa ripacrena laiplacar, ne Raraŋ Aetaniacna meikramtairmo, kabe, kabemo kekelamunna kai ke teac. Moca Raraŋ Aetaniaca ma ritri waparaca mona ramoot ndaruca ma nenmo ritri waparaca monandet.

---

**5:7** TW 11.14, na Ier 5.24, na Osi 6.3, na Iol 2.23, na Sek 10.1, na Lk 21.19    **5:8** Ro 13.11-12, na Pil 4.5, na Ib 10.25, na 10.37, na 1 Pi 4.7    **5:9** Mt 24.33, na 1 Ko 4.5, na Ie 4.11

Na ne warac, an ritri waparaca mona ramootta, ma ande tiŋ kamma lambica maeacreke.

<sup>10</sup> Aintik aukna Iesusa ripacrena laiplacar, ne ŋgaua Kacootna i mbuŋa wiwitica mboprena rambca morina ramtairta ndamŋiraŋ. Mina puŋnaŋgepca minmo tipemb kirarir ŋgorikca morinan, na mina ndorita nikinik iroarmo, moa gagraca mina an mitkarmo mbukrina. Na ne an iroarta tipemb kirarir minanmo aŋgica anna ranŋairan.

<sup>11</sup> Na ne warac. Aia gaindoprena, “Meikramtaira iroar inkara moi gagraca, na mina mitkarmo mbukrenan, mina laiŋ teacnandet, na mina tongoca wereica eacrenan.” Na ne Iobna nininimo ne waracrinan, ma ndona nikinik iromo moa gagraca ma ndo ndarurina mitkarmo ma mbukrina. Aintik ne lamŋirenan, iŋmbaia Kacootta manmo tipemb kirarir laiŋga moatnan. Na laŋ, aia lamŋirenan, memetmbaca Kacootta ma aimo kakadmai aniacap, na ma aina moca kadmairena.

*Aia tamuŋna auŋmo wanaiŋa gidikca kai aci mbop teac*

<sup>12</sup> Aintik ne Iesusa ripacrena laiplacar, reac lacaua ne monanna gaind, ne tamuŋna auŋ, co, gan tiacarpaik, co, kabena reikmo i ŋgaca, tamuŋna auŋmo gidikca kai mbop teac. Na ne, “Laŋ,” ndop te, “Laŋa,” anna ma min. Na ne, “Wanaiŋ,” ndop te, “Wanaiŋa,” anna ma

---

**5:10** Mt 5.12, na Ib 11.35    **5:11** NA 34.6, na Iop 1.21-22, na 2.10, na 42.10, na Nŋap 94.12, na 103.8, na 111.4, na Mt 5.10-11    **5:12** Mt 5.34-37

min. Moca ne tamuŋna auŋ ndopca Raraŋ Aetaniaca ma nenmo rurutina opoik ŋgoreaca neaŋnandet.

*Ramoot wandoŋna mbembendei ma gargarap*

<sup>13</sup> Na nena ianna ma mitikap te, ma Raraŋ Aetaniacmo mbendei. Na nena ianna ma nikinik iroa toŋtoŋap te, ma Raraŋ Aetaniacna i aŋgi ŋgepna ŋaip kumb.

<sup>14</sup> Na nena ianna ma roumbap te, ma Iesusna ritipaikta meikramtairta tumbunna ramtair paŋaindmo aci kipca mina manmo watna. Te, mina Kacootna i mbuŋa tabairmo mana tikca tik te, mina Raraŋ Aetaniacmo mbendeica ma mana roumbmo, mo laŋa monande.

<sup>15</sup> Na mina Raraŋ Aetaniacmo ripaca mben-dei te, Kacootta an roumbapna ramootmo, mo laŋa moca manmo mo ŋgepnandet. Na ma tip ŋgoreacna makukca mo te, Kacootta mana tipemb ŋgorikta makukarmo mo kecarinandet.

<sup>16</sup> Ainda moca ne kabe, kabea nena tipemb ŋgorikta makukarmo, Raraŋ Aetaniacna meikramtairmo ndorita tipemb ŋgorikta makukarmo mbop warac. Na ne kabe, kabea Raraŋ Aetaniacmo mbendeica, ma nemo moi laŋa monandet. Aintik ramoot wandoŋa ma mbendei te, mana mbembendeica ma gargar aniacap, na ma kabena meikramtairmo otacna min ŋgoin.

---

**5:13** Epe 5.19, na Kol 3.16    **5:14** Mk 6.13, na 16.18    **5:15** Ais 33.24, na Mt 9.2, na Mk 16.18    **5:16** TW 9.18-20, na 1 Sml 12.18, na 1 GRP 13.6, na Ŋap 34.15, na In 9.31



<sup>17</sup> Na Elaia ma aina kirarna ramoot. Na ma Raraŋ Aetaniacmo gagaraca mbendeica pukca iarir mbonkacapa tipmo mba rapacri, na pukca mba rapacatke.

<sup>18</sup> Na iŋmbaia ma mac mbendeiri, riaca pukmo wattacarica pukca marapacat, na wariŋna amta reikca gaca makotri.

*Ramootta taup wandonŋmo tikcaririnan, aia manmo mac nda aŋgi kip*

<sup>19</sup> Na aukna Iesusa ripacrena laiplacar, nena ianna Raraŋ Aetaniacna kam gidikmo tikcari te, na tamtamma taŋ te, na Iesusa ripacrena laiplacarta ianna manmo aŋgi kip te,

<sup>20</sup> an laplacauca ma tip laŋ mamoot. Aintik ne an kammo matau ŋgoinna lamŋiraŋ. Na laplacau ianna ma tip ŋgoreacna makukna ramoot ian ndambuŋa taŋca manmo otaca ma taup ŋgoreacmo tikcarica ma Raraŋ Aetaniac ndambuŋ nakip te, ma an tip ŋgoreacna makukca morina ramootna ŋeronŋmo mac nda maŋgiat, na ma mba menacitndait. Na an tip kirar mbuŋa Raraŋ Aetaniaca ma tipemb ŋgorikta makukar wiŋ aniacmo, ma mo kecarinandet.

---

**5:17** 1 GRP 17.1, na 18.1, na Lk 4.25, na Up 14.15    **5:18** 1 GRP 18.42-45    **5:19** Mt 18.15, na Gal 6.1    **5:20** Ŋap 51.13, na ML 10.12, na Ro 11.14, na 1 Ko 9.22, na 1 Ti 4.16, na 1 Pi 4.8

**Raraŋ Aetaniacna Kam Wembaŋ Lan  
New Testament in Mborena Kam language  
Nupela Testamen long tokples Mborena Kam long  
Niugini**

copyright © 2016 Pioneer Bible Translators

Language: Borei

Translation by: Pioneer Bible Translators

© Pioneer Bible Translators Association of Papua New Guinea, Inc.; © Pioneer Bible Translators of Dallas, Texas, USA

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-06-21

---

PDF generated using Haiola and XeLaTeX on 18 Apr 2025 from source files dated 29 Jan 2022

8e1073ed-d2dc-5f3a-bb48-5406185123a7